

嶺雲海日樓詩鈔

嶺雲海日樓詩鈔

己酉稿

南武山人丘逢甲倉海著

同懷弟

輯輔編輯

贈莫生

海上原多不死藥此語傳自秦漢間
安知古語今始實不死不在求神仙
病原不死藥之死競咎中醫失醫理
由來官失學在夷卽今論藥已如此
多君賣藥高韓康專從海上搜神方
瓶中海水盡甘露不須更待神農嘗
五羊城頭春草發五羊城外春潮濶
搗藥仙禽啼海雲春風過處江山活

吳穎芝太守

蔭培

過訪兼示守廉紀事詩

風雨鳴雞夜檣晨將詩重話嶠南春八千里外還珠郡
十七年中珥筆臣編集已成前歲月賣刀猶念舊軍民
昏昏海氣仍今日誰爲天涯洗劫塵

吳穎芝名騰培

疊前韻答穎芝 二首

天涯爲客負芳晨五嶺南來幾度春適越豈容章甫士
登臺空弔老夫臣夢回黃屋無真帝淚灑朱崖有棄民
君是故游吾故國東風愁說海揚塵

來詩念及臺北
云甚惻然

廿載沈冥雞失晨九州求友鳥鳴春過江人物誰傖父
度嶺文章幾逐臣縞紵忽逢吳季子琴樽休負葛天民
韶光未老須行樂明日飛花化陌塵

南園感事詩

有序五首

南園在文明門外水木明瑟爲前明粵中前後五子賦詩高會地後人卽供俎豆于舊壇坵間旁有宋三忠祠故伊墨卿以君臣三大節詞賦十先生題其門陳東塾爲重書以揭之其旁復有廣雅書局皆南園地拓也兩廣學務處已借以治事廣東學務公所仍之前後在事諸子暇輒爲詩鐘之會當其寸香甫燼鐘聲鏗然門捷誇多爭執牛耳復創爲表格以積分法高下之體制雖纖瑣乎而與會者皆興高采烈以爲此樂不減古人年來傷離歎逝意興非昔然其事尙不輟至今今年公所始遷地重重影事思之憮然

張生六士有詩爲廣其意和之并索前在園諸子同作

一代風騷起海湄千秋忠憤剩荒祠興亡併作斜陽色
如此江山合賦詩

五百年間幾劫灰南園非復舊池臺溶溶玉帶河邊水
曾見張喬照影來

豈獨傷心爲古人五年前事迹俱陳

預詩鐘會者方子順太守陳子星太令姚伯樸魏縣高嘯荆太守先後俱

逝餘亦多建官四方升沉異趣

青青幾樹河橋柳不待飛花已送春

粵中柳不作花

女牆殘月度鐘聲捉鼻微吟笑洛生不信風流今歇絕
夜烏啼雨過春城

春潮欲上水松陰春夢迷離不可尋人去堂空簾不捲

碧闌干外晝沈沈

次蘭史席上韻卽送北上

萬里難馴羨白鷗一尊坐對瘴雲收
中年親故尤傷別亂世文章易寫愁
撲岸海潮新戰史隔江燈火鬼樊樓
出門未敢輕西笑同是清歌在漏舟

憶上杭舊游

前年記作上杭游路入林塘
村名境便幽三宿空桑吾不厭
春燈山寺話神州

江隨山勢百千盤江上春雲釀暮寒
滿徑山桃紅簌簌斜陽呼渡大姑灘

黃坑黃筍舊知名惜我來時筍未生
我是主人兼看竹

綠濛濛地一兜行

尋碑親拜左丞墳譜牒都成史闕文七百年來遺老盡

更無人說舊參軍

維祿公墳曰左丞地家譜以公孫遷葬者官居左丞故云者始遷葬焉公元孫乃宋左丞繼即信國參軍創兆先生父也

春田漠漠草萋萋油菜花開烟葉齊鬼谷祠邊春市散
淡雲微雨過藍溪

各鄉各族分房祖各有家祠額字嵌龍虎朱竿獅白石

門前燈寫大官銜

梅花十八洞中天聞有桑麻未墾田洞口雲封人不到

空中樓閣住神仙

柿葉微丹栗葉黃園林無限好秋光我來剛在春風裏

萬樹梨花玉雪香

萬峯頂上訪前朝龍旛相傳出御窠皇覺天人遺象在
家家齊捧佛香燒

東南山豁大河通

借唐
人句

汀水南來更向東四面青山三

面水一城如畫夕陽中

一作滿城樓
闕畫圖中

斗旁拜鬼都何益且拜吾家兩直臣百尺樓頭看天象

古來豪傑盡星辰

城內祠有魁樓兩直臣謂
族祖給事弘御史公道隱也

蕭疏樹石香光畫乞付裝池橐載回殘冊流傳佳話在

有人拚棄一官來

果園以謹文敏舊冊贈云前有
某僧因此贊爲上官迫索去官

偏傳絕學到東夷寥落中原事可知今日陽明祠下過
冥冥雷雨讀殘碑

知是煙痕是露痕四山一碧竹連村家家製紙臨溪屋

水碓聲中晝掩門

三年不負題詩約十日曾爲置酒留如此溪山歸未得
眼前滄海正橫流

以攝影法成澹定邨心大平草廬圖張六士爲題

長句次其韻

我生本在東海東中有萬二千尺出海之高峯此峯上
有萬年不化之古雪玉立天半尤奇雄我生延平同甲
子墜地心妄懷愚忠毘耶故國不能守脫身兵火燒天
紅坐令玉山竟落五百年後此一切有愧東渡滄海朱
家龍扁舟走閩復走粵鬱然五嶺佳氣何蔥蘢神僧許
我一片乾淨土闌然入戶精靈通

謂楊悅樓
即入夢事

閩粵之交小卜

築手斬荆棘披蒿蓬南來騰空立天馬天馬騰空爲鐘平八景之一北眺水

月明石虹仙橋尤爲縣勝境上有庵坊邑令題曰石虹水月玉華金簡皆鐘名並羅列吾廬爲主

山爲從東望軍山念吾祖君山一名軍山以劉兆先生爲文信國軍時義軍由此起也勤王當日亦

復師無功吾廬之西萬松頂大山小山森相宮此山乃

若特爲吾廬設山名不妨偶與匡君同四山之中中有

村吾廬適在村當中人間若別有天地桃花流水盡日

聲淙淙額吾廬以黃庭語豈欲上躡神仙蹤表吾廬者

奉新許筆勢勁若銘彝鐘心太平草廬額許中丞仙屏書丙申之春吾廬寔經

始買山更在光緒乙未之初冬十五年中一轉瞬輞川

圖畫久慕前賢風鏡中誰作此狡獪山林舍宇人物頓

覺如親逢堂堂乎張文采冠吾黨前輝後光昌而丰人

生意氣潛契合東山茯苓西山松爲吾題圖意乃在圖
表証今引古詞何鴻卽以詞論已超絕直與明鏡攝影
齊神工嗟哉文學在今日遭值世宙方昏霧已抑公羊
作餅家更誣孔子爲儒童三年不飛亦已矣豈有一舉
天能冲夔乎欲論太平世人狙出口誰能容君家仲堅
昔吾慕偶然遊戲海上思作虬髯公安知仍落此世界
儒冠復戴奄奄欲絕甯吾衷已無一時豪傑可摧倒聊
欲萬古開拓吾心胸崑崙崙山脈走南戒萬水趨海朝祝
融此間山水清雄良足寄懷抱且收倚天長劍韜神鋒
太平之民或容作教取子孫識字爲耕農南荒丹山本
鳳穴鳳雖不至吾仍種竹栽梧桐夢中忽見海上故親

友落月黑塞林青楓偶圖山居志吾幸已脫劫外乃勞
翩然大句相推崇人生得閒無事亦仙福黃庭此語吾
所宗有山不歸果何樂世網一墜嗟重重廬山之君昨
招我雲中手把青芙蓉

心太平草廬乃公山居攸定村宅名

以攝影心太平草廬圖移寫紙本

自題五言古六首

寫影入明鏡移之尺紙間明鏡無遁形難得山真顏而
況尺幅紙欲寫四面山山中有吾廬更有山中田嘗爨
知大意見羽知吉光但寫一角山吾廬山之陽溪泉何
湯湯樹石何蒼蒼山盡補以雲中有無盡藏

天下萬山祖其名曰崑崙崑崙有南支萬里趨越門人

生亦有祖誰非黃炎孫歸鳥思故林落葉戀本根我從
海上來卜廬淡定村東望徵君山吾祖祠墓存明夷兆
誰筮參軍墓誰題呀呀朱鳥味鬱鬱冬青枝夜半雪壓
廬重撰銅絃詞

絹壽八百年紙本壽過之人生百年耳寫此將何爲吾
亦愛吾廬此意陶潛知黃者徑菊花碧者門柳絲南山
有佳氣松風吹酒卮高詠歸去來宜得圖傳之惜皆付
後人圖者非當時十日畫一水五日畫一石姚翁年七
十照海鬚眉白爲寫吾廬圖森森見松柏羣山走腕下
萬里若咫尺

昔者陸放翁庵額心太平自云此三語取自黃庭經放

翁振奇人平生喜談兵上書論北伐策馬嘗西征未甘
以文字供奉小朝廷至老志不衰家祭詩可徵吾生于
放翁所遭百不同同者惟此心天或哀吾窮有海界不
波有歲畀常豐吾窮足自慰老作太平翁

吾生寡嗜好獨嗜佳山水吾廬深山中頗具丘壑美每
詠紫芝歌老親色然喜山中白雲詞時取教諸子雖不
求神仙亦究黃庭旨誰謂神仙言治道不在此一心先
自平萬事罔不理天下不太平必自人心始仙者特山
人其人常葆真吾亦葆吾真一室天下春

山中有老桂已閱五百年不知衆木中何自全其天得
毋月宮樹落子生此間亭亭十丈許翠蓋凌秋烟花時

十里香黃雪霏霏然此桂天下無是當別作圖上圖棲
翠鳳下圖覆玉蜍再閱五千年見桂知吾廬

疊韻再題心太平草廬圖并答溫丹銘

洪水已注滄溟東溟者爲澤高者峯茫茫大陸號中國
戰爭幾輩誇英雄成爲帝王敗寇盜佐帝王者臣稱忠
有史以來數千載幾朝戰血山河紅天地殺機不一發
草澤各倖蛇成龍一龍昇天衆蛇伏龍居雲氣偏蔥龍
是時天下號一統兵戈四海初交通青青戰地見禾黍
遺民墾土鋤蒿蓬威加海內猛士盡貫日無氣成長虹
噢咻屢下寬大詔與民休息民咸從詞臣例上太平頌
舉朝將相爭言功迂儒掉頭不肯信手撫古瑟調商宮

獨居深念此何世此仍據亂非大同亢然遠慕太平世
高歌金石深山中山中古瀑飛潺淙白雲滿徑無人蹤
冥心自鑄太平象人間半夜聞清鐘儒書自昔用者寡
況今閉塞方嚴冬匹夫慷慨念天下我正坐有迂儒風
僂然與世無一可太平夢想能躬逢已不作太華陳希
夷又不作武當張三丰胡爲獨誦黃庭內景語謾謾山
閣風生松有山可隱尙不隱秋南春北爲賓鴻自名曰
士亦求食其術更紉農桑工不知挾持果何具謂欲與
世除昏霧太平有待吾且老豈有丹鼎能還童眼中鷄
鷲各爭長臥看一鶴蒼霄冲廟堂紛紛有人在山林養
志猶吾容臥龍一出太多事惜不終老從龐公吾廬山

村曰澹定聊付圖畫旌吾衷文昌題句歎奇絕已若丹
篆吞吾胸窮郊忽出八叉手一收寒態生春融雲龍上
下吾黨事豈詒衣鉢傳機鋒九原若起柳州柳定許古
調歌黃農春山花落桐君桐春雨夜長楓人楓手披舊
史發浩歎無數神聖紛追崇乾坤一儒腐可笑差喜吾
黨詩相宗畫中吾廬在何許羅浮東望烟雲重四百二
十二峯正初日海天朶朶金芙蓉

溫丹銘名庭教大埔縣人

寄亦璞羅定軍次

爲問安之抑勝之祇今此事幾人知窮荒草木皆生意
滿目春風上大旗

寄韞白三水

半晴半雨釀春和春水溶溶綠始波二十六江樓上望
不知春在那江多

嘯桐北上歸臥病漚瀆屢書來索詩以紀當時之
事今春復申前約距亡日僅浹旬耳

牢落文章第一人天門垂翅竟何因百年記注無前例
萬事樞機有要津異日朱雲空憤激當時絳灌少交親

紅蓮幕客蒼梧守未許青蒲作直臣

考御史列第
一而不得紀名

無路排雲叫九關天涯何處與招魂千秋公論歸風漢
四海才人哭寢門斗酒隻鷄追夙約尺書雙鯉剩春痕
平生風義吾尤愧一慟荒江晝欲昏

春江

春水綠生波春江打槳過陰晴渾未定莫便脫漁簑

寶漢茶寮歌

青山不幸近城郭萬墳鱗莖成瘡瘡安知近郭無完墳
前者已掘後者藏每遭兵燹尤不幸攻城築壘多夷傷
拋殘萬骨沒秋草墳磚墓石墻營房君不見五羊城外
山上墳明碑已少況宋唐千年忽出買地碣玉骨久化
黃塵揚土花洗出南漢字傳之好事珍琳琅當時邑里
藉考證其奈書劣文併張清明風吹花草香出門拜山
車馬忙茶寮雜坐半僮父誰弔扶風廿四娘

孟徵以粵秀山無咎室詩見示次韻

平生未悔作乖厓亦解逢人輒道佳閒處看雲容獨立
說場論古喜相排一春積雨盡生寵滿地殘花蝶上階
自笑窮愁天海窄輸君空濶好詩懷

樓臺高占好林巒曾寫春愁此倚欄雲物與時同變換
文章有淚下孤寒百年人事悲絲染四海風塵把劍看
休被故山猿鶴笑羅浮歸訪葛洪丹

題張生所編東莞英雄遺集

熊飛何異意繁煥駭觀生
張家玉家珍皆東莞人

榴花村人義旗起梅蔚山下行朝峙桓桓仗鉞熊將軍
落日光迴海雲紫時先從祖判韶石心共將軍表忠赤
嗟哉天水不復碧熱血射天天爲白

先從祖諱必明韶府食判與熊
飛同殉韶難脫時時白血上射

來胡運無百年此鄉復出東莞伯東莞山水天下奇英
雄屢見生于斯天生英雄付劫運尤傷心者袁督師敵
方用間朝不知長城自壞甘人欺朱明亡局決于此何
待粵中爭立時北都破敗南都棄二閩四廣成何事君
臣遺冢空殘碑流花橋畔啼鵲淚爾伯爾侯蘇與張張
家兄弟不可當蒼黃百戰野塘死一死何止流螢光用張文刻
詩書人言東莞古聞邑有人弔古編遺集六百年來戰血
涼夜半靈旗鬼雄泣鬼雄未造殊可哀破碎河山莫收
拾圓頭山人爾何幸東南保障功名立我愛英雄尤愛
鄉英雄況並能文章手持鄉土英雄史倚劍長歌南斗
旁

熊飛東莞榴花村人南宋末舉兵勤王藏元軍於榴花村復廣州韶州後殉難韶州
何真字邦佳元末大亂舉兵南東後歸明太祖封東莞伯

袁崇煥萬曆進士監軍關外拒情有功崇禎初為兵部尚書督師寧遠入援都城以反間被殺
蘇觀生字子聚以薦進起官南京陷擁立唐王於閩為大學士敗逃廣州又擁立唐王弟潯兵至自縊死

君臣猶茲流花橋

張家玉字元子號嶺進士唐王敗後舉兵東莞隨桂王轉戰各屬家族盡滅兵敗增城投野塘死

張家珍家玉仲弟年十七隨家玉舉兵勤王轉戰於歸家玉沒珍鬱以詩畫終

古銅兵器歌

德侯侄堊其父覲臣明經于粵岡工人掘墓下得古
銅斧一銅戈頭一銅匕首一古澤盎然可寶也因爲
作此

朱黛斑斕古銅斧揮日斷戈同出土就中古劍尤陸離
想見前皇奮神武五兵之鑄銅爲先用銅尤在用鐵前
土花洗出古兵器白日頓見二千年此地開疆始秦漢

此器殊難年代斷玉魚塋地忽有此蕭瑟河山戰雲散
方今兵器尙火攻縱橫海上兵尤凶伏屍百萬閃電頃
古兵雖在皆閒銅藏之地下無不可古魂夜嘯青燐火
出付人間考古人九天日月消兵禍

秋懷八首次覃孝方韻

萬古興亡閃電過百年人事幾蹉跎海枯石爛英雄盡
木落江空涕淚多人夢人間無白日洗愁天上有黃河
茫茫四野穹廬底來唱陰山勅勒歌

蓬山淪沒阻東歸看慣年年海水飛剩有壺公教地縮
更無萇叔與天違窳窳落日神猿哭苒蓀秋風虜馬肥
今日秦庭非復昔休將九頓拜無衣

王母雲旗縹緲間冥冥龍去枉髯攀海中仙蚌流珠淚
天上寒鴉怨玉顏往事已淪開寶史故宮曾唱紇干山
劇憐未殉西陵塋定策歸來國老閒

滿目洪流治已遲誰教天展九年期元黃大化無今古
風雨神山有合離四海畢消蛟蜃氣九天同拜虎龍姿
書生自作華胥夢千載何妨此一時

休訛舜死與堯囚環海居然更九州日月不隨天左轉
江河還向海西流蛟螭國土黃金界鵬鸚旌旗白帝秋
畫革旁行新史筆未妨荒外紀飛頭

秋城吹角夕陽斜浪迹頻年寄海涯拔後枯菴心未死
劫中殘局着全差無聊身世文爲戲有例神州裔亂華

不信東籬仍故節，島夷章紱玷黃花。

東海求仙撰怪文，西園諧價策高勲。眼中鷄鶩方爭食，意外蛟龍未得雲。左纛豈誇蠻大長，短衣休叱故將軍。秦王夢裏鈞天奏，此曲人間本不聞。

浮雲落木共飄蕭，動地商音起素飈。雷雨神龍雙劍化，關河戎馬一身遙。黃天訛立多新說，赤道廻流有熱潮。窮海高秋無限感，雄心依舊借詩銷。

秋懷次前韻

八首

三十登壇往事過，英雄兒女兩蹉跎。他鄉白髮愁邊滿，故國青山夢裏多。未刼文章龍起陸，孤星涕淚鵲填河。弓衣繡坼秋魂冷，休唱尊前舊楚歌。

東去遼城鶴不歸南來汾水雁猶飛元黃殘血三靈哭
蒼白浮雲萬念違入世功名貂尾賤過江風物蟹螯肥
干戈滿地吟梁父未合隆中老布衣

丘墟只在百年間京雒風流渺莫攀同化胡先亡李耳
抱頭人反笑嚴顏掃除孛彗天邊宿夢寐金銀海上山
不信歡愁全不管白雲無恙道人閒

美人消息碧雲遲甲帳珠襦未有期江上青山名大別
穴中朱鳥號長離談經鸚鵡多新語添色芙蓉變舊姿
欲采蘼蕪何處是亂峯無際夕陽時

鸞受鞭笞鳳受囚眼中烟點失齊州掀翻成案無三古
抖擻羣材出九流歷歷星辰天市夕冥冥雷雨海山秋

兩頭北極還南極不在雲霄最上頭

北斗橫天天漢斜支機殘石落天涯萬靈雨泣三元改
六道輪迴一念差洪水餘波湮息壤故宮遺玉刻荏華
瑤池欲弔西王母簪遍人間白柰花

青骨鍾山蔣子文白頭郎署杜司勳英雄潦倒耽聲色
神女荒唐送雨雲彈指頓成新世界化身曾現大將軍
年來學得觀空法謝絕人天百不聞

大旂落日馬蕭蕭更遣輪飛海上颺百戲魚龍殘局短
一軍猿鶴故山遙收雷入地藏陰火呼月升天起怒潮
別撰修羅新戰史鈎陳兵氣未能消

次韻易實甫肇慶道中

牂牁天半下飛湍立馬江頭客據鞍疆域遠通蠻部落
威容重見漢衣冠傷心元老騎箕去特張文襄告薨極目層霄把
劍看零落七星秋滿地天涯扶醉且憑欄

少瀛以詩舫自壽詩索和走筆書此

同年桂平黃少瀛乞我詩壽張詩舫示我牛腰詩一束
壽詩舫者多公卿公卿滿朝盡朱紫持梁刺肥老且死
安知海外百萬天朝民一任剗屠作人豕誰非黃炎之
子孫九天忍令呼無門上書宰相毀苛約此義已比昌
黎尊百年萬事半顛倒中外約章那可道嗟哉勿謂秦
無人我惜詩舫今已老詩舫前曾上書李公文忠請廢與禁結民約侍兒能畫兼能詩
專家詩畫傳女兒詩舫雖老足自遣且姑謀樂休憂時

少瀛一官老東粵詩舲不官爲粵客相逢相見五羊城
我亦憂時頭早白海風十月寒吹人出門欲覓梅花村
梅花仙人儻有不老術仙山同醉羅浮春

黃少瀛廣西桂平人已丑進士

題陳老蓮畫石芝萱草

憂來不可解且寫忘憂花更寫石上芝筆端英英生紫
霞中原剩此埋憂土縱不忘憂亦徒苦采芝聊作商山
翁留取丹青照千古

題董文敏秋山圖

明淨如妝說郭熙尙書能畫客能詩秋風吹上鵝溪絹
剛是淮南木落時

圖爲僻淮上歸所作有眉公題句

歇絕風流五百年
海天呼鶴話雲間
于今畫隱樓頭看
不是吳山是粵山

圖爲粵中盧氏
畫隱樓舊跡

贈張伯純

通典

伯子天下士
十年知汝名
相思黃歇浦
相見趙佗城
落日秋山色
寒濤大海聲
九邊田牧計
擊楫送君行

張時辦廣
西鹽政

戲贈蔣亦璞試院

槐花黃時舉子忙
使君忙過槐花黃
一樓閉置似新婦
三月清齋逾太常
使君曾上烏臺坐
使君鐵面比包老
打門有客來送詩
門吏莫疑關節到

嶺雲海日樓詩鈔

庚戌歲附民國元年辛亥稿

南武山人丘逢甲倉海著

同懷弟

輯輯編輯

與楚儋千仞聞歌作

春雲不雨晝陰陰有客南來作越吟
衣上黃塵飄熱淚鏡中白髮迫雄心
懶呵鬼壁勞天問拚共神州付陸沈
漫笑箏琶娛俗耳未妨聊當海潮音

楚儋葉在江蘇吳縣人
于何樂姓南縣人

蘭西將去潮次鷓鴣韻送之

四首

白日昏昏海欲波東風來與起沈疴
鷓鴣得失關何事金石文章自不磨
破碎河山收局險支離官職累人多

于今鴻鵠高飛去羅網終當奈爾何

歸去青山吏隱兼壓裝束筍稿新添陰符夜讀貂裘敝
殘雪春回馬耳尖四海魚游愁鼎沸一官蟬蛻避竿黏
相逢燕市吾徒在醉插花枝滿帽簷

但聞有鬼預曹謀豈合無人借漢籌一統皇輿搖鼎足
九天兵氣動旄頭人才幾輩徒功狗文字何能祇汗牛
一笑馬羣空冀北竟持芻豆困驂騑

神武吾慚早掛冠臨歧今日喜相看熏天寶氣功名賤
滿地橫流道路難文士豈宜逢世亂高官原不稱儒酸
防身一劍乾坤窄南斗荒荒北斗寒

清明日游白雲山

二首

宣統二年春二月尉佗城外作清明江山霸氣無今古
鶯燕時光半雨晴玉鳥難逢方外士銀槍空弔劫餘兵
東風一笑登高去雲白峯青萬里情

披雲來訪鄭安期卓錫兼尋景泰師名士無聊託仙佛
神州有淚混華夷濛濛海色聞邊角莽莽春愁上酒旗
斜日下山謀一醉紅棉開徧越王祠

廣州晤湯蟄仙同年

海沸天翻二十年那知重見海南天鰲支殘極難孤立
龍臥空山尙苟全懺悔金經千劫佛摩挲銅狄兩頑仙
荒荒離合羅浮夜風雨聞雞各惘然

實父以木棉雙鶴歌見寄時約游端末果行次韻

寄答

牂牁一水走南海勢如揚子江黃河人生萬事聊以自
娛耳黃屋左纛將如何百年行樂彈指頃若爲楚舞吾
楚歌使君楚人今屈宋新詩萬首珠娘誦道大君猶老
子龍德衰我愧周侯鳳牂牁江上開紅棉舊游應憶朱
明天江山咫尺成萬里恨不雙鶴同蹁躚翡翠明珠失
光采崑崙歸來衆山矮當代文章幾鉅公何人有汝才
如海青霄直上凌丹霞雄劍干將雌莫耶剛金百鍊柔
繞指登壇說法霏天花知君獨立蒼茫處駕鶴無賓留
鶴住二十六江春水生冷看春潮自來去

再柬蟄仙 二首

鬚鬢雖蒼兩頰紅
路人排擁看坡公
方謀車轍環天下

湯時以路
事來

猶悼方壺沒海中
身世浮沈關運會
河山破碎負

英雄老親健飯真奇福

尤西
常句

差幸平生此事同

蒼涼喜見日方東
未死安能萬事空
災異頻聞成亂象
雲霄何處託冥鴻
百年觀察知夷禮
四海論詩入變風
碩果尙留吾輩在
莫教陽九數終窮

蟄仙見和前詩時將歸浙仍用前韻 二首

陽明且戰且講學
學派曾傳揭嶺東
鱗爪島夷矜弋獲
皮毛年少枉推崇
空山偶得觀心法
橫海虛期破虜功
今日會稽誰繼起
天涯攜手雨濛濛

嶺南荔子甲天下徑欲留君待荔紅風雨落花三月半
光陰如水廿年中圖沈鳳渺無消息筵短龜長有異同
滿目江山仍百越相逢莫放酒尊空

柬沈友卿

明明昨夜此星辰愁亂愁荒過一春道路青絲來白馬
衣冠皂莢洗黃塵沙蟲入目軍全化獨狗傷心帝不仁
今日人才寥落甚英雄待起捉刀人

春盡夜次韻寄答實甫

二首

春燈照夜不成寐四野荒雞天未明處處聞飢復聞亂
年年憂雨更憂晴讀書誤我成迂叟呼酒憑誰迫老兵
六幕沈沈如夢裏曉星殘月不勝情

挂席春江未有期東風潮信誤篙師戴鰲已歎沈三島
嬉鳳安能陋九夷精衛淚枯填海石蚩尤魂化竟天旗
鬱鬱荒唐山鬼前知事雞卜何人問越祠

題岳忠武王書前後出師表石刻

一堂坐對兩忠武兩表縱橫一指麾故國惜無諸葛相
大書留刻臥龍祠英雄涕淚偏安局金石文章異代師
萬古雲霄開卷見外家吾愧是孫枝

先祖創兆公曾參文信國軍事
娶于岳國忠武王曾孫女也

題東坡三洲岩題名石刻

東坡渡海歸游此玉乳岩曾題數行字鬼神護鑄鑱古
人棄我去留我題名處何時我來游亦刻數行字玉乳
千年溫洞天散花雨

裝裱宜蘭山人獅子圖已成題其端

宜蘭山人昔訪我爲我畫此獅子圖滄桑轉眼萬事變

世間何物爲公孤

此卽世俗所謂太師少師圖也

十年棄置不復道敝篋沉沉

任獅臥寒蟬飢鼠不敢近題詩況有蘭陵老

圖有贊伯孫詩

十年

始付今裝池展卷如見真狻猊褒公鄂公毛髮動人間

少此英雄姿睡不醒今已醒坐撫奇兒氣尤猛大地

山河一吼中一出羣雄歸管領

二高行贈劍父奇峯兄弟

嶺南今日論畫手二高傑出高于時渡海歸來筆尤變

丹青着手生瑰奇小高溫溫清而壠大高短小雄有髭

我方主敎羅以禮翩然作我圖畫師嶺南二月二月時

杜鵑啼上紅棉枝小高寫扇昨贈我相看令我生古悲
杜鵑帝蜀昔亡蜀從此化爲亡國物一啼津橋炎宋衰
再啼大都胡元沒何人復拜古帝魂杜陵野老空自屈
鳳凰麒麟今不來羽蟲毛蟲胥可哀昨聞大高忽畫虎
羣雄草澤爭驚猜畫虎高於真虎價千金一紙生風雷
我聞獅尤猛於虎大高畫獅勿畫虎中國睡獅今已醒
一吼當爲五洲主不然且畫中國龍龍方困臥無雲從
東鱗西爪畫何益畫龍須畫真威容中原豈是無鱗鳳
唐人圖
陶句其奈潛龍方勿用乞靈今日紛鑽龜七十二鑽謀
者衆安能徧寫可憐蟲毛羽介鱗供戲弄粉碎虛空一
物無上天下地存真吾奇峯之峯劍父劍乞爲我寫携

劍崑崙看瀑圖

劍父近目于江南勸業會
覽虎及龍奔飛瀑圖

送趙渭卿之湘藩任

三湘七澤徧哀鴻
天遣開藩向楚中
何術竟能消浩劫
此邦原未息雄風
嶽邊行旆芙蓉嶺
外離尊荔子紅
四海荒荒期月可
早將新政報姬公

題楚儋汾湖弔夢圖

國靈爲訪葉小
龍詩作二首

臨流淺土塋嬋娟
殘碣重摩勝國年
別有故家喬木感
傷心不獨女飛仙

五百年中一刹那
汾湖凍合不生波
娟娟故國梅花月
應有仙魂化鶴過

東秦子質軍門

昔爲循吏今名將吾道由來文武兼山澤龍蛇湫穴徙
風雲猿鳥簡書嚴思親夢寄陶公鮓教子經傳尙父鈐
留滯五羊重握手十年憂國鬢霜添

參字號名炳直

題友卿鸞簫集 七首

當君得婦江南日是我移家海上年鐵馬金戈成底事
風流真羨玉堂仙

鐵厓圖畫倉山表佳話流聞直至今表惜不傳圖不得
掄才巨眼愛才心

開卷江郎一序存文章知己共論昏安知夢裏瀟湘雨
筠管斑斑有淚痕

庶常舊館今非昔惆悵先朝舊侍臣依舊簫聲依舊月
乘鸞來看海揚塵

長爪仙人鬢未霜蓬萊清淺話栽桑何時雙引朝天駕
碧落重來沈侍郎

瓊林重宴願非奢花燭重諧更足誇重訂紫簫吹月譜
蟠桃八十四番花

荆釵蓬鬢海南天偕隱萊妻亦自賢甲帳繡襦談故事
輸君夫婦是神仙

游羅浮 二十首

西風震庭樹明月將中秋側身城市間惘惘懷百憂眷
言命儔侶明發游羅浮步出城東門雙輪帶扁舟扁舟

下西江夾岸多田疇晚稻已青青桔槔猶未休東江自
東來西合西江流我舟泝東江白雲何油油遠見雲中
山軒然豁雙眸舍舟易以輿將入雲中游

我作羅浮游如得名畫讀初爲水墨山渾渾元氣足純
作披麻皴遠未辨單複安知一皴間饒有萬包蓄興行
山漸近如畫忽易幅界劃絢金碧渲染間青綠易爲着
色畫光彩炫吾目靈奇本天質神理何醲郁偉哉造化
工繪此餉眼福

羅浮五百里遠視橫成嶺奇峰近乃見高者飛雲頂四
百卅二峰峰峰有靈境撥雲入上界三峰抑何挺天鷄
夜一鳴登峯見初景赤波際天起海上火輪轉不知羣

陰匿但覺萬塵靜俯視下界人沈沈夢未醒

太行與王屋離之自夸娥浮山海上來誰爲合之羅想
見初來時驅海生洪波連巢移鳳鸞閉穴潛蛟鼉仙山
落人間一失成蹉跎我亦海上來今日相經過登高極
遠望去日常苦多轉眼滄與桑麻姑鬢應蟠蓬萊渺何
許奈此仙山何

天下十洞天朱明次居七福地七十二泉源亦其一洞
天福地間云古神仙室如何古仙人一去不復出古來
神仙傳傳者疑非實我不求飛昇但願充隱逸吐吞雲
與霞沐浴月與日四百卅二峯峯峯有屐迹一峯住十
年一笑吾事畢

羅浮名天下始自秦漢間相傳治此山其人皆神仙自
從兩晉還有客來談禪遂令仙與佛分占此名山何年
霸主宮宮此山之前昔時金銀闕今日無故磚黃龍下
白雨洗出山真顏依舊仙佛徒雲際開松關

明儒盛講學天下皆講席幾令名山間有儒無道釋有
人囊羅浮夢裏天海碧四百卅二峯一囊不爲窄天雞
忽破夢瞬息時代易篝火狐鳴徒山中岸赤幘洞天與
福地污蠅殊可惜何時此名山復奠緇黃宅無復儒者
宮來游但詩客何來碧眼胡亦蠟游山屐爾徒慣豪偷
勿此爲山賊

東南麻姑峯其下有酒田西北酥醪觀其上有酒泉樂

哉羅浮君君此酒國間我自來山中小飲常陶然仰觀
日月行恍若羲農前不知人間世何用百憂煎乃知仙
之徒以酒全其天住世爲酒人出世爲酒仙笑看桃花
開一醉三千年

滿山皆奇石欲拜不勝勤滿山皆甘泉欲品難爲分無
泉不成瀑無石不生雲飛瀑下雲間處處聲相聞九百
九十瀑雲氣常氤氲置身雲瀑間獨立誰爲羣雲出作
霖雨瀑下成溪源非無濟物功同頌羅浮君爲問泉與
石甯復本性存

老仙攜神娥一醉同元丘鳳臺吹簫女亦引長庚游飲
食男女間大道任所求舍此求飛昇枯死荒山陬我羨

葛稚川鮑姑爲好逑夫婦皆神仙福慧真雙修攜手白
玉京五城十二樓遊戲下人間分艾醫龍疣窮生得明
珠窈窕起九幽仙心推所欲人天願同酬我來朱明洞
仙艷迹尙留作書告山妻我欲居羅浮

山間逢媼婦蓬鬢兩乳烏開口多是非作詩誚髯蘇少
年喜狡獪意者其麻姑我行會仙橋有女來踟躕未敢
輕吟詩恐或逢仙姝翩然一笑去山鳥鳴相呼回首麻
姑峯雲霞時有無

非石亦非木非青亦非綠山中銅龍魚云是稚川畜東
坡昔時見魚一而龍六何時益八龍靈怪驚俗目嗟哉
古銅仙化身同一哭南漢昔鑄時銅光九天燭不知誰

負去得毋見可欲惟有金佛身至今守羣禿趺坐金蓮
花冷閱人世速明月飛上天慎哉保爾獨

山中何所有黃鱗朱鳳皇雀蝶各五色爛熳同飛翔遺
薪有丹氣搗藥聲丁當出洞五石豬各佩天樂章仙留
竹篆符蛇虎人不傷山中凡禽蟲飲食皆天漿山中凡
草木一一生天香出爲藥市藥治疾走八荒丹渣亦治
疾泥丸流丹光惟有九節芝云生自松肪朱草生瑤池
合藥成仙方我欲往採之雲氣晨茫茫且斲萬年藤持
之壽高堂

山下有林處村墟各耕牧山上有林處中皆道釋屋維
林衣被山上下同一綠其樹十九松亦有籠蔥竹楓林

或間見餘者靈草木松大皆合圍百萬聚龍族命之曰
樹海綠濤時起伏雲來變綠色日入紅驟縮人行若魚
游鳥獸成水畜有時雲布海樹海爲所覆上下同一雲
浩浩無平陸峰巒覆不盡洲島聯或獨高松偶聞出森
若帆檣矗雲動天地浮雲靜天地肅雲海有收時樹海
觀乃復徜徉兩海間怪偉娛心目

崑崙東南支逶迤成五嶺南趨鎮南海氣勢尤雄猛是
爲羅浮山宜與南岳並其勢可代興天與非爭鼎如何
落嶺外命之曰佐命名山如英雄自具大本領可王亦
可霸獨立乾坤靖自放南海湄箕踞非偃蹇西風海不
波晴穹落秋影昂頭出天外南斗夜耿耿

嶺南天早春故是梅花國羅浮千萬樹況自仙人植陽
厓雲氣暖陰嶺雪光匿先春各自花枝南復枝北千巖
萬壑間冰玉同一色香雲飄上界洗出太陰黑疑是古
女仙幻影仙山側豈作凡美人但現色身色師雄爾何
人說夢癡已極流傳人間世夢囈同大惑

羅浮有游客始自陸大夫邇來二千年游者繁有徒紛
紛噉名客摩勒傷山膚羅浮古仙人多半仙之儒流傳
但仙詩不見留仙書魯公昔兵解棋局山中娛不聞古
釵脚重見神仙都服食求神仙往者有髯蘇曾書丹竈
字變易今非初朝斗壇已荒洗葑池亦蕪我書本意造
下筆猶踟躕青城不敢唾浪墨甯非汗爾徒思銘功盍

勒狼居胥一笑且長吟仙酒傾百壺山靈驚知己此客
千古無

羅浮看日出奇勝甲天下我來兼看月恰值中秋夜萬
山同一月登高自舒寫看月兼看霞霞光照尊罍兩山
分霞處草木爲之赭看霞兼看雲雲飛不可把青天如
穹廬團團覆九野我兼看風雨離合此山者此山得天
多我得亦非寡

我訪朱靈芝亦訪華子期天扃與地鑰典守麾龍螭稚
川作四庵芝房息我疲諸仙各壇洞一一貢我奇歷叩
女仙居白石開岩扉仙已不我繼佛豈能我羈遂登華
首臺花雨何罪罪五百阿羅漢雲際咸低眉草沒阿育

塔苔荒阿耨池遂飲卓錫泉笑爾頭陀師乾坤正傾側
釋道皆中衰我雖不講學亦拜四賢祠救世仗吾儒儒
言亦卑卑妖氛海上來天戈無能麾神州若不保何況
山一隅此山可避世斯言恐吾欺且作十日留賦我羅
浮詩

西麓爲白雲東麓爲白水夥頤羅浮君廣惠皆所理羅
浮迎我來白鶴山中起羅浮送我去白鶴城中止在山
與在城鶴飛殊未已寄家羅浮下誰領東坡旨東坡携
朝雲西湖照羅綺爲誦羅浮詩雲水空濛裏

冲虛觀 三首

聞道丹砂可駐顏兵符自解向君前羅浮半夜梅花月

著到仙書第幾篇

懶游大海龍常伏寂守空山虎亦瘖自把癭瓢澆藥去
洞門花落晝沈沈

蓬萊閣上紫煙生朝斗壇邊斗柄橫雲臥三更仙夢醒
滿天明月步虛聲

羅浮中秋

仙山來作中秋節月比人間分外圓我與羅浮同不睡
坐看明月過中天

丹竈

仙令丹成已上仙山中丹竈尙依然遺丹夜半出浴日
四百四峯光滿天

洗藥池

仙人洗藥池時聞葯香發洗葯仙人去不還空池冷侵
梅花月

酒田

麻姑峯頭彩雲光麻姑峯下酒田香不向麻姑買滄海
但買酒田耕夕陽

羅浮寄內

胡塵不到洞中天蝶繭爲衣酒有田尋得名山解偕隱
葛家夫婦是神仙

答梁友玉鄰

風雨年年自合離島夷聞道屢探奇人間正門移山力

不信羅浮睡不知

羅浮睡子陳蘭甫語公度以入詞句

有譏衣冠冢詩刻於石者戲爲正之

留迹空山亦偶然行雲流水古神仙人間任作衣冠冢
不碍騎龍自上天

延祥寺

林間見佛閣雲臥袈裟冷斜陽僧閉門滿地棋欄影

寶積寺

路轉青林石磴懸佛廚巖腹起蒼煙滿庭花影茶筌響
來品羅浮第一泉

九天觀

誰言九天高今忽在平地仙院闕無人松陰雙鶴睡

過白鶴觀訪何仙姑祠觀大小水簾

九霄飛瀑下雲中
門閉仙祠石蘚紅
白鶴不來丹鳳去
笙簫松栢自天風

羅浮五觀皆龍門
派戲成一絕

誰合南宗入北宗
洞天門啓白雲封
羅浮久是吾家物
莫怪看山道氣濃

華首臺 三首

古臺僧種萬株松
斲茯苓芝作佛供
滿地綠雲涼不動
雨花橋畔一聲鐘

門署程鄉李仲昭
人天同把佛香燒
昏黃一片羅浮月

留照梅花影不消

念佛堂門有李次卿侍御書額李遺詩紙
存水中梅影七律三十首予擬爲刊未果

老鐵真書瘦益奇何人知出猛龍碑名臣遺墨通臣記

五百阿羅共護持

鄧錫香煥騰撥聯有康長發跋語

黃龍觀 三首

何處天華有故宮降王執挺去恩恩秋風吹醒黃龍夢
牛角河山夕照中

一逕陡如盤鶻起萬松怒作老龍號

劉襲村聯語在客堂中

傷心別有

先朝史落日空山弔汝曹

西風木末一亭孤夢裏黃龍忽有珠我自尋秋舒倦眼
青山盡處莽平蕪

酥醪觀

醉攜神女跨雙龍重向元丘訪舊蹤露是酒香雲酒氣

月明上界第三峯

茶山觀

雲中雞犬聲仙家在何處一徑入雲深落日攜筇去

稚川手植梅枯久矣擬就故處補植之

二首

仙根重植葛仙梅花向仙山依舊開誰與鮑姑寄芳訊
滿天香雪鶴歸來

夢中休現美人身香夢沈酣易賺人但願化身千萬樹
花開長布嶺南春

梅花觀

青山斷處碧雲遮不見羅浮舊酒家我是出山更回首
雪天重約訪梅花

羅浮異石怪瀑舉目卽是不止一處也

羅浮泉石皆奇絕到處看山瀑濺衣石氣化雲雲化水
青天白日玉龍飛

羅浮山下人家

五首

仙山住久卽神仙豚栅雞栖屋數椽雲霧甜茶紅米酒
抱孫閒過太平年

深山深處破茅堂大袖長衫半道裝八九村童圍一席
孝經教到庶人章

仙禽啼處葯苗肥日日攜鋤上翠微葵葉蓑衣棕瓣笠
滿山風雨抱雲歸

綠欄新買小烏犍待種麻姑賣酒田牛背夕陽吹笛去

桃花紅落晚霞天

種菜何人此閉門萬山高處有山村東風乾盡酥醪菜
葉葉元丘舊酒痕

羅浮山陰特少道觀戲成一絕

闕地開天有此門古來大道此中存道人不解求玄牝
空把桃花作飯吞

自羅浮至惠州游西湖泛月放歌

上不見羅浮是惠州下不見羅浮是廣州仙山不喜近
城市羣仙日日驂鸞虬我從廣州來十日羅浮游東坡
游後有此客兩山風雨爲之收晴天佳月逢中秋一醉
十日羣仙留翩然逕向惠州去羅浮送我直上東江舟

舟行江上風颭颭雲中揮手辭羅浮但見一江自西至
宛宛東合東江流兩城夾峙江之頭兩城交通浮橋由
附城爲市市有樓百貨山積民所求東城屬縣西城府
屹然屏蔽廣州東路之上游東坡自言寄家羅浮下安
知白鶴新居寔在東城陬我來自在西城住桮山一院
清且幽又向西城城西喚湖舫西湖泛月開金甌此湖
東坡去後亦寂寞對月不飲湖之羞西城今夕爲我遲
更籌羅浮之君儻念我應寄山中仙酒名酥醪令我痛
飲忘却人間愁呼月下飲聽清謳我醉欲眠月自去湖
天漠漠雲悠悠

西湖弔朝雲墓

四首

東坡到處有西湖老尙湖堤遺姓蘇不是湖光勝杭穎
那教留冢葬名姝

心持一偈證人天草歇無芳柳不綿誰採蘋花薦遺冢
秋風漁唱滿湖煙

我亦乖時不合宜此生未受美人知綠衣千古公言在
黃土青山喚可兒

何年雲雨散巫陽瘴霧沈埋玉骨涼合種梅花三百樹
六如亭畔護遺香

白鶴峯訪東坡故居

噫噓乎嗟哉禮部尙書兼端明殿翰林侍讀兩學士已
降甯遠軍節度之副使更令惠州與安置兩徙合江樓

兩遷嘉祐寺白鶴新居始經始上梁文已成鑿井事兼
紀堂名德有鄰鄰者豈惟翟夫子林行婆家酒何旨釣
魚有磯瞰江水齋名思無邪詩案可勿起亦有西湖可
行樂堤之橋之尤可喜已擬携家老於此一住四年春
睡美奈何復遣落僊耳人言東坡仙果仙人言東坡死
不死東坡海外竟歸矣只因曾飽惠州飯白鶴千年震
遺址峨峨祠宇峯頭峙朝雲有旁龜過子亦從祀更祀
稚川與元亮先生可謂有鄰已墨沼朱池尙宛然我來
訪古秋城邊文章光燄磨蝎避耿耿奎宿方行天

野吏亭

紅荔將軍樹青山野吏亭孤亭何灑落大樹久飄零松

鼠窺書幌莎雞上畫屏欲尋坡老記棕葉滿空庭

惠州西湖雜詩 二十首

十里湖光盪翠煙近湖人總種湖田莫教全割湖雲去
留取眠鷗浴鷺天

玻瓈五色照開廳湖艇仍標紫洞名欲向西新橋洞去
另呼杉版過橋行

有例杭州與潁州放生池卽在湖留于今誰乞羣鱗命
漁網斜陽十里秋

占斷湖波滑笏春蘇堤依樣接湖濱何人爲種堤邊柳
搖落秋風亦可人

落日青山湖上峯湖天秋色在芙蓉游人欲問朝雲墓

看取團團塔頂榕

分割栖禪已可哀
紀功空費勒銘才
人間更有癡兒女
亂葬朝雲墓畔來

何處飛來脫劫塵
準提閣上祝能仁
誰從玉色毫光裏
真見如來瑞相身

永福寺前嘉靖碑
賦詩人喜破倭歸
山門重刻坡仙字
波磔全乖一例肥

山色湖光占幾分
豐碑平噤此銘勳
羅浮風雨魂歸處
零落松楸太保墳

門題山水小蓬瀛
前輩傳經講席橫
一片湖雲遮不住
藕花深處讀書聲

伯牙臺上記留題更寫豐湖五別詞竹葉蔗渣俱妙筆

米顛書法杜陵詩

宋正公先生五別詩相傳以蔗渣書其伯牙臺詩醉中以竹葉書見石湖題語

東坡留硯更留銘湖叟能談舊事聽欲訪風流賢太守
青山何處夕陽亭

亭亭桂樹影扶疏何處投竿許老漁留得濬湖遺疏在
花洲合祀鄧鴻臚

携屐尋碑遍洞天錦囊零落鬼才篇排雲長爪呼阿嬭
留鎮湖山孝子阡

臥庭雙柏老成僵墜石蓬萊事渺茫元妙觀中尋二妙
筆花殘夢弔江郎

誰携兒女泛湖歸笑語聲中棹欲飛消受湖天好秋色

蘋花香上素羅衣

黃塘寺畔幾人家種菜年年當種花賣菜入城歸欲晚
湖船攜酒看殘霞

紅棉水榭水中央落盡紅棉樹亦荒湖鳥叫雲蟲弔月
西風吹送十分涼

欲寫西湖泛月圖羅浮游罷到西湖空明一片天連水
畢竟羅浮此景無

西湖橋下水雲蘇春水桃花白飯魚我與西湖留後約
不須重寄廣州書

與客談羅浮之樂并言居山之利因成長句

山原漠漠宜牛羊山田決決宜秔粳御園柑子垂垂黃

煙沈霧結香木香更種千章萬章木斫運有溪筏可張
滿山飛瀑穿雲飛到處皆可張輪機山人小試作雲碓
用水之力微乎微山中沙亦黃金色天子不取防人賊
萬戶侯何足道哉是皆致富可敵國但作神仙不富貴
赤手上天亦何味天上金銀作宮闕豈特如來金布地
我願金成方上天金光普照蓮臺蓮何事顏回忍飢面
冷豚一豆人稱賢何年來結山中屋山中採金兼採木
且工且農且畜牧青天回首羅浮雲祇恐山靈笑吾俗

秋晚過二君祠

濛濛城郭倚斜曛十萬人家半暮雲草木變秋連五嶺
文章憎命弔二君荒祠蕪沒甍甍徑壞閣啁啾燕雀羣

何處憑高許長嘯青天碧海斷知聞

初有大海
堪憐聞

自題三十登壇照片

十六年前莽少年當時赤手欲回天
誓師雷雨窮荒外開國河山落照邊
往事已憐成過電雄姿未稱畫凌煙
于今不作登壇夢漁鼓聲中號散仙

重九日得詩五比京使館中秋來詩次韻却寄

三首

滿城雨歇做清秋天末懷人賦遠游
我正登高聞鴈過一書萬里海西頭

開書隔海話中秋君發書時我出游
海外陰晴同此夕月明四百四峰頭

西風容易一年秋老抱雄心尙壯游
休笑報書無別語

山中新種橘千頭

附原作

涼宵好月又中秋把酒粵華成舊游

前年中秋君招飲於粵華舊院

今夕

新詞歌水調幾多離合感心頭

答友卿病中見贈次韻

二首

與君同話神山事鼉憤龍愁又一年夜半聞鶉仙夢醒
明珠成淚玉成烟

示疾維摩方丈室散花天女更何人不妨再說彌天法
遍布閻浮大地春

次前韻再柬友卿

二首

但覺人間無限事不知天上是何年東風更趁西潮猛

搖動齊州九點烟

安能鬱鬱久居此還我堂堂地做人無病亦呻何況病
梅花孤負嶺南春

劉郎歌贈伯端

劉郎年少何翩翩誦詩喜我羅浮篇我今蒼蒼已在鬢
但覺年少如神仙龍蛇出地星墜天欲持劫運慚我孱
羅浮燒丹尋稚川仙丹九轉童我顏會當携手出劫外
重話開明龍漢年

次韻答陳少石方伯

寡人南海思北海萬里方吟憶弟詞白日看雲同報國
青山爲我更題詩羅浮風雨仙何在軾轍文章虜亦知

有菊花開卽重九老坡休負賞花卮

次韻答俞君實廉訪

四首

君從五指峯頭返萬里看行有脚春今日臯陶同頌禱
更無人祝獄中神

真成婦孺知司馬邊事應教虜氣降天下荒荒誰救溺
甕中兒仗石能撞

到處名山蠟屐頻筆端還挾氣嶙峋荒唐愧我羅浮夢
冷對梅花憶美人

五百四峰無限好天南留滯莫言歸人間那有閒田地
抱甕青山許息機

枚伯以長句題羅浮游草次韻答之

我有故人子王子其居乃在天台山天台四萬八千丈
石梁橫空不可攀桃花流水空人間仙山縹緲吾情牽
惜未來賦赤城篇故人出山到南海一官絳帳兼高懸
相逢但說道可道坐令仙山冷落天池蓮神州尙未陸
沈盡山仍吾山川吾川我生不辰處東海中有玉山高
拂天幾年坐嘯玉山下長蛇薦食來蜿蜒斬之不得避
而去恨滿東海何能填人生萬事一夢耳當時枉作如
雷顛四海無家一身客十年潦倒秋風前羅浮之山鎮
南海一筇逕往開秋烟海上蓬萊此左股五色雀蝶何
翩翩神仙白日來雲駉雲中鸞鶴同蹁躚長爪麻姑定
識我共話滄海成桑田人間尙有未了事仙丹雖熟無

能仙沈沈天風引廻船滿山靈草何芊芊朱明洞天遲
吾主空看日出娛雲泉天下大洞天者十金銀宮闕名
山巔天台第六羅浮七洞中閣道原交連君雖未到羅
浮去天台飽享雲霞妍丈夫不作神仙亦當作豪傑莫
但留名萬古將詩傳

王叔伯 名丹瑤浙江人時爲兩廣優級師範監督

新甯劉小芸將爲大江南北之游介孝方索詩壯
行爲賦四絕句

滾滾黃塵起馬前書生仗劍出南天秋風萬里中原路
一髮青山落照邊

大江北去是黃河飢旱頻年菜色多淚盡伯鸞心尙熱

西風自唱五噫歌

中華天啟帝王都其奈曾經亂五胡南戒走完行北戒
河山還屬漢家無

眼中烟點小齊州老我看人作壯游斜日佗臺謀一醉
蕭蕭落葉滿城秋

劉小英名狀舉

短歌贈沈星橋叟

長星勸爾一杯酒天下不如意事十八九我亦厭聞何
況叟沈叟來自萬壑千岩間行年七十猶童顏活萬人
封古聞此封之大郡宜酒泉還其渾渾未鑿之真人
間萬偽一真少一笑相逢海天小有時醉墨寫真意沈

沈海夜天初曉南海秋風一事無爲我手作羅浮日出
圖趕却殘星趕却月赤日行天萬物蘇

游西樵山

六首

我從羅浮歸山水興未已遂作西樵游江行百餘里始
由支江入帆轉稻花裏百曲赴大江遠見山雲起山雲
帶夕陽移舟泊山市未入西樵山先飲西樵水

樵山七十二峯樵湖廿八曲斜陽權歌起湖光盪山綠羣
峰萬紫翠畢入湖人目湖轉山益深懸蹬出林麓雲際
聞雞鳴知有山人屋

白雲出洞去留洞待客來洞中何所有石破青天開初
日照幽林金碧眩樓臺樓臺道士居飛瀑聞驚雷坐石

看飛瀑醉引流霞杯洞門了不關白雲何時回

芙蓉亦花妖轉海毒我民嗟爾道士居告誡何諄諄流
毒且百年禁令今始伸至今論外禍此特爲之因昏莽
持外交實出親貴臣入山見署額咄哉彼何人署盟亦
此筆遺禍今未泯一言足喪邦坐使利益均留名亦山
辱幸爾猶全身遙遙兩仙館雲泉與長春風雨秋一葉
海外成青燐爾徒媚道心所志惟金銀奈何不斬虜飛
劍乞洞賓

曖曖山下村黃雲穫秋田鬱鬱山上村茶竈飛秋烟山
中多奇石亦復多名泉頗聞此山中古亦有神仙何人
此讀書談道傲聖賢樵夫聞大笑遂爲外人傳天地有

此山幾世而幾年凡愚門智力鑿破古洞天治窮盜賊
起耕牧難晏然丹井尙未湮書堂亦未傾暮雨秋蕭蕭
欲往不敢前豈有綠林豪能識博士船

五嶺夾江行西江在其南江南亦連嶺分派由滇黔送
江直至海排空起瑤簪是爲西樵山海氣霏煙嵐誰擲
青蓮花照耀天光藍我來寫秋心佳處未遍探樵山作
山樵何年留茅庵

西樵山在廣東南海縣西南

雲泉仙館次壁間韻與易實甫同遊諸子作

一逕凌空破曉烟眼中秦漢古山川何年穿石泉飛瀑
滿地栽桑海化田不肯丹黃秋後樹別開日月洞中天

雲霞管領吾誰證七十二峰無限緣

次前韻

霸氣消沈化冷烟更無一尉起龍川重携蘇子吹簫客
曾訪麻姑賣酒田到處雲遊惟看瀑幾時石破再驚天
呼龍出作樵山雨東爪西鱗偶結緣

羅浮亦名東樵特方諸雨

題粵中遺蹟畫

四首

越王臺

南武城邊暮角哀蠻夷大長剩孤臺只應海日荒荒色
曾照當時左纛來

榴花塔

蛟奮龍擎石上文天留此塔表將軍江山不改亭亭影

落日空村鶻叫雲

厓門奇石

塊肉消沈海氣黃海門石不共朝亡蒼苔也有驅胡意
蝕盡題名字一行

紹武君臣冢

龍蛇枯骨亂蒿蓬草草危朝一局終落日啼鶻春夢短
流花橋畔弔東風

波羅謁南海神廟

五十二韻

莽莽扶胥鎮廟祀南海神晃旒古王者龍服如天人甲
裳列將吏珠翠羅妃嬪維神鎮炎荒坐撫萬介鱗自粵
隸版圖歷代修明禋豈惟司潮汐勞旱關喜暝有時特

告祭天子命大臣紅棉二月花廟瓦朱璘璘斑斑兩銅
鼓神威藉而伸雄鳴雌輒應奔走百粵民東風吹萬艘
打槳波羅春神壽知幾何云是神誕辰香烟靄高空廣
庭雜羞珍魚龍進百戲曼衍何佻佻是時廟市集蜚語
爭蠻銀泥鷄繪丹彩妙若能鳴晨終歲婦孺工罄售未
浹旬年年荷神床近廟民不貧我來秋九月寒日搖江
瀕市閒廟亦靜神几生秋塵落葉紛滿階僧厨應添薪
捫鼓復讀碑兩廊且匝循顧瞻門庭間蠹鼠何砢磷宋
明開國初武功碑具陳明祖起布衣尤表雄無倫惜皆
在唐後但覺年代新最古惟韓碑日月光貞珉碑缺亭
亦圯重建需百緡同游各傾囊再至功應竣我思此廟

初寒瞰南海濱風濤旦夕生欲往多逡巡行舟較今拙
動輒憂沈淪偶因遣祭歸疑神福其身作碑旌厥功匪
特耀所親安知古滄海今化田畝畝廟門通江路沙壅
久且堙古人繫舟處泥沒雙石麟去門數百武高丘碧
嶙峋上爲浴日亭破曉奇景臻蘇詩儼在石駁落未盡
泯海雖去漸遠浩蕩猶無垠半夜潮始生雲霞捧紅輪
此亭得此景古語仍可遵我從羅浮歸飽看跋烏跋維
舟此廟下秋風吹白蘋雖非邀神福崇古端冠巾杖策
登此亭寒綠生松筠浩吟一以眺雙江遶如紳斜陽正
滿目秋波碧粼粼海山萬紫翠雲駁難爲勻惜無古人
見此景爲寫真神鴉送客歸去去秋江津

前詩多見和者所懷未盡復次前韵

天地創造初先進者鬼神其次造萬物靈者厥曰人有
雄則有雌匹耦爲妃嬪概謚之曰蟲倮毛羽介鱗鱗蟲
聖者龍乃獨崇明禋人雖靈萬物惴惴伺喜瞋惟龍能
上天爲天之下臣代天照天下鬱儀與結璘雲雨雷電
風龍氣爲屈伸遂以鬼神力用禍福吾民當其偶入蟄
天地爲不春精氣常在天託象爲星辰方今萬國旗各
畫國所珍凶禽與悍獸戢戢何仇仇國旗所到處互市
爭金銀惟吾國旗龍黃閃天方晨龍以海爲家不知幾
由旬爲靈實昭昭國豈長弱貧大哉祝融汪何年廟其

頗自有此廟來更歷幾劫塵廟木皆十圍樵者不敢薪
東江入西江廟下道所循相將俱入海海山碧磷磷天
子治四海吾國古義陳其實西北方地廣漠無倫有海
惟東南戰局乃日新何人跨海功海外鑄蒼珉赫然一
樓船費數百萬緡一礮數十萬經年工始竣一往而不
復惘然問水濱惟茲大海間龍職在所巡龍乎其有靈
敵舟當沈淪況吾國旗上之而皆龍身茲廟鎮南海尤
與軍民親壁壘何森森原田何昁昁紛紛羣夷舟海門
不可堙我讀韓公碑披髮思騎麟大荒渺何許海濶山
嶙峋羣魔害正道亂象日益臻皇皇地下民種族憂將
泯安得龍旗龍一出定八垓呼天下雷電爲我礮與輪

龍旗驅風雲畢令正朔遵紫髯碧眼奴抱頭走踈踈持
酒酌神龍雄風生膏蘋功成告天地還我舊角巾禮上
明堂圖樂奏嶰谷錫百神並受職爲加冠與紳我借南
海龍雲臥寒秋粼是時天所覆帝澤罔不勻作詩告陳
侯少石舊和此詩此語何當眞夜看雙龍光南出斗牛津

思三友行

梅江東行受衆水將以入海爲韓江羣山挾之並東走
誰爲傑出吾能詳中惟三傑寔吾友陰那銅鼓與鳳凰
我泝韓江行鳳凰日日隨舟翔雲烟萬古長青蒼鳳凰
朝來不可見陰那五峰忽當面分治江南江北上下游
采地各連數州縣陰那近與銅鼓連梅江宛宛山後復

山前行人但見鳳凰縱拔陰那橫列並拂天安知銅鼓
之勢尤高騫梅江去海五百里海上已見銅鼓山鳳凰
之旁一突遠出微雲間自海入江行十日此山忽隱忽
現常飄然乃與鳳凰陰那交爲緣鳳凰如猛將當關森
嚴立甲仗陰那如才相高掌遠蹠抱雄想獨有銅鼓如
劍仙變化無方不可狀平生愛山如愛友況此三友怪
傑世希有我行梅韓二江間相對欣然輒呼酒嗟爾沈
淪嶺外真數奇匪我爲友將安歸我方潦倒不適時安
能使爾之名天下知乃復年年與爾常相離秋風千里
懷人夜江海冥冥遶夢思

題仗劍崑崙看瀑圖

萬山萬水發祖處萬方人物此胚胎欲尋盤古開天迹
仗劍崑崙看瀑來

牛山礮臺訪梅

牛山曾約看花來萬樹梅花遶將臺昨夜軍書報梅信
弄寒花已五分開

少石以實甫唱和詩見示次韵

水駟傳詩東屢修簿書忙裏且閒偷三江此地朝南海
百甓何人運廣州微雨漸催殘臘近寒梅已放故園不
欲尋高處同舒眼浩浩風煙鎮海樓

友人有越邊之行戲占送之

絕代美人常遠嫁分明怨恨託琵琶彈盡邊風與邊月

祝天長護貌如花

附民國元年辛亥稿

謁明孝陵

四首

鬱鬱鍾山紫氣騰
中華民族此重興
江山一統都新定
大纛鳴笳謁孝陵

如君早解共和義
五百年來國尙存
萬世從今真一系
炎黃華胄主中原

將軍北伐逐胡雛
并告徐常地下知
破帽殘衫遺老在
喜教重見漢威儀

漢兵到處虜如崩
萬馬黃河曉蹴冰
直掃幽燕搗遼塞
昌平再告十三陵

謁明孝陵詩一首
軍初定南京正盛兵北伐故公謁明孝陵而作此詩

登掃葉樓 二首

我護百粵軍飲水古建業雪恥告百王掃胡如掃葉落
葉蕭蕭滿石頭江山佳麗此登樓坐領東南控西北金
陵仍作帝王州

今日征誅一洒掃羣胡如葉風前墮依然龍虎帝王都
我來偶借蒲團坐樓外長江江外山今日江山方我還
眼前待說彌天法未許老僧閒閉關

掃葉樓在南京城內

雪中遊莫愁湖 四首

湖波如鏡盪寒光曾照金釵十二行一片明光新境界
雪中來過鬱金堂

年年打槩石頭城坐閱王侯幾戰爭任奪江山誇勝着
一湖難奪女兒名

江邊何處莫愁村湖雨湖雲蕩客魂長得佳人抱腰看
不教洗馬對人言

長祝龍天護美人英雄兒女局翻新荷花楊柳華嚴界
再借湖光現色身

莫愁娘在南京城外

先父潛齋先生能詩先兄詩學乃出自庭訓特資質穎異八歲卽能詩讀作日不輟積各體詩達數萬首甲午之役與臺灣俱亡茲編計僅千餘首自乙未內渡起迄南京臨時政府成立後止中間應酬之作多無存稿按年編輯得十二卷原先兄之詩世多知之而先兄之志則或知或不盡知蓋詩所以言志者也先兄旣以才學見知於當世而少抱改革之志因時未遇不得志之事常八九每藉詩以言其志故集中多激宕不平之氣海內人士或稱爲詩界革命鉅子者蓋專論先兄之詩者也當臺灣立國失敗而歸主持嶺南教育者十數年專以培植後進灌輸革命爲宗旨他如力爭賭禁密護黨

人皆所以行其志也迨粵省反正粵討虜軍翹然獨出
其將領多出先兄門下當時官吏逃舊日士大夫多避
港澳先兄獨力扶持省局并主任教育旋赴南京組織
臨時政府勞瘁嘔血扶病還家彌留時猶喃喃以南北
大局及前敵軍情爲念聞和議告成含笑而逝有心人
莫不傷之以爲大不幸事然君子尙志苟所志既達雖
天促之年亦何足傷今先兄已矣其才學雖不能盡發
舒表襮於當世而民國旣成所抱之志已遂在先兄亦
可以無憾矣而世之君子不識先兄者讀其詩即可見
其爲人知其志之所在誠恐遺稿日久散失則不獨人
亡而一生遺志亦與人並亡故不能不輯而印之同懷

弟輯輔謹跋

中華民國二年秋初版
中華民國九年秋二版

門 生

黃逢堯

丘漢濱

林商翼

李時造

饒景華

王伍梅

王獅靈

丘倫才

黃慕松

林風人

丘濬華

李兆書

等校印